

伊  
想  
集



伊想集題詞

今海內錦繡才子自學士大夫至野人遊女無不知有  
雲間陶穎儒者乃穎儒益自貶損訥訥然若不能出諸  
口所謂矜才使氣不知消歸何處至其爲詩文如幽燕  
老將所向無敵洵奇才也讀伊想集可以想見一斑黃

岡杜濬

息廬詩沈鬱慷慨絕似韓杜膾炙海內已久至于伊想  
復以幽澹蒼老勝人詩格愈工可謂更上一層樓矣三  
原孫枝蔚

落想高結撰異朱絃疏越一空凡響今人抹殺韓孟詆



何嘗夢見同里陸慶臻

近來作詩者開卷惟近體數首耳求其排律百韻古風數十句者絕少甚至五七絕句亦不可得吾于伊想獨喜其長篇及絕句蓋不敢言賞鑑家然賞鑑實在耳目外也竹西汪懋麟

穎儒天姿高徹學問淹通不屑隨人步趨然下筆時往往暗與放翁合千古才人所見略同乃爾錢塘倪粲

詩家各有專長難于諸體畢備今讀伊想集又何一往情深各極其勝也詩有別長我于茲益信同里張彥之晚山黃葉野寺疎鐘秋水夕陽芒鞋竹杖出伊想集臨

風高唱有不拊掌狂叫者必非人情海昌陸嘉淑

往予與穎儒握手平江酒壇詩社無會不與穎儒興醋落筆如風雨驟至工而復敏兼相如枚臯之勝甫脫藁輒爲同人攜去所存無幾然而桂林一枝足以想像全豹矣平江蔡方炳

伊想集

五茸陶爾稷穎儒

擬古 選五首

宛宛園畔桑莫莫谷中藟娟娟一美人豔豔服紈綺青  
青兩鬢雲草草無心理征人行不歸歲月去如矢空房  
來悲風思君何能已

鬱鬱凌霜栢託根山之垂與君締姻好紫歲附松枝作  
計保堅貞皓首日月期荷戈應召募去去天一涯蹉跎  
歲序晚綠鬢漸成絲辟彼薜木花朝榮夕還萎豈待涼  
颺發然後凋華姿君心苟如石賤妾何所疑



攬轡陟高岡四顧惟宿草當其在春時豈不憐惠好一  
朝霜風披顏色頓枯槁盛衰固循環策名貴及早靈鳥  
不可羈來日苦漸少達人圖令德寸陰以爲寶  
來者不可必去者不可留岸幘望廣陌雜沓陵與丘珠  
柙穿藤根銅駝仆壠頭悲風起白楊落日黯長楸過者  
猶悽惻泉下能無愁

戚戚歲將晏明月落屋梁亂蛩鳴四壁征夫愁衣裳跂  
彼織女星終日不成章獨宿怨遙夜馳情夢容光錦衾  
疊紈簾蘭麝縈寒香願得解珮環携手登牙牀暫遇旣  
不久又不敘中藏亮無鷓鷯翼安得雙翱翔顧瞻仍孤

獨翹首遙相望浮雲何時歸流涕灑空房

南邨四首

蕭條門巷似僧齋石髮無人綠覆堦逢世何心趨席帽  
入山決計辦芒屨社前活火分茶乳雨後長苗煮豆豉  
鳧渚鷗汀塵不犯直疑天自厚吾儕

春歸何事不關情綠樹陰中耳暫傾語燕似悲花盡落  
鳴鳩相賀雨初晴繞畦麥舞風前浪入枕松調水際笙  
長日可憐閒處度儘須爛醉作工程

西風叢菊綴深黃酬謝高秋有一觴永夜月明蟲暗語  
長天雲濕鴈相將歲豐田父輸租早雨足園公種菜忙



處處祝畚迎社鼓爭教宋玉獨悲傷

竹陰深處是山家課雨量晴度歲華人靜喧林多鳥鵲

村荒餉客只魚鮓挑鐙夜聽雞聲促蹋雪香分梅影斜

見說新年看又到羞將短髮對菱花

一作安排筆  
研頌椒花

周鼎軒三索題美人折花圖

小園春色鬪芳菲纖手拈來露正晞携入深閨花落盡  
餘香還透五銖衣

寄邵天衢仙期一作仙期惠借  
宋詩長句代書

平生懶惰無一事屈首喜誦少陵詩手摹心追廢眠食  
佐以昌黎韓退之二公浩氣塞天地點筆皆成金石詞

窮極哈呀探溟渤預為宋人開藩籬眉山劍南嗣逸響

伐毛洗髓骨格奇行空肯受羈紲耻笑彼局促轅下駒

但恨唐人不見我不獲鞭弭秦鞅決雄雌世人第以耳

作目等閒棄擲同土苴千夫翕訛同一喙隨人啼笑真

可悲手捧一編朝復暮云是天寶大曆我所師刻舟求

劍計何拙仇父禰祖母乃迂元酒雖堪格神鬼塵飯邨

可當膏粱豈特目未窺全宋枵腹亦為唐所嗤近世虞

山叟崛強不隨時辟邪放淫不遺力一掃雲霧還朝曦

宋人橐本次第出殘編落簡勝璠玞始信萬物有定數

屈伸貴賤天所持但愧文章不足垂不朽何患千秋百



伊想集  
世之下無相知我嗜宋詩有奇癖昌歆羊棗難爲喻昨  
從湖賈購一帙幘幌大半飽蠹魚辟猶吉光得片羽斑  
豹僅從管中窺以茲抑鬱不稱意中宵起立長唏噓先  
生藏書千萬弓雞林搜輯縣高貲倉頡以來迄昭代牙  
籤玉軸芬如絲鉤元纂要鬚髮白青鐙永夜聞吾伊許  
我讀書真種子一編簡出身手齊麥光瑩潔回削巧乃  
是有宋一十七朝之珠璣是時狂生正茗芋展卷不覺  
驚且疑繇來此書號難得先生何以絕不顧四癡嗚呼  
先生假我錦繡段虞翻骨相不敢衣先生假我金錯刀  
雖利難把窮愁揮爭似此編可以忘渴饑恬吟密詠皂

帽欹藤牀竹几生光輝願讀萬遍寫萬本口瀉源泉指  
生胝歸之石室黃金匱延津雷雨神龍飛

感舊 選三首

青陽一曲冶遊歌人在層樓鬪綺羅錦作障泥停驥裏  
釵當壓鬢倚嬌娥柘枝紅袖春風便鴈足銀鐙夜月多  
三載橫塘消息斷木蘭花下近如何

小院垂楊逗晚霞斑騅初繫絳桃花別來瘦損腰如削  
醉裏嬌癡鬢欲斜阿母低傳屏後語侍兒新淪雨前茶  
錦衾香暖殷勤話再倩東風到妾家

青樓十二曲闌干學就琵琶倚醉彈細綰同心盟月夜



獨輸半臂怯春寒寶釵私贈香猶膩紈扇新題墨未乾  
慚愧舊遊還入夢玉人金粉畫中看

唐

士侷

嵩少招飲分得帆字

板扉晝靜白雲銜携杖重過旅恨芟地僻不嫌衝雨屐  
盃行好似順風帆唾壺醉後頻煩擊畫鼓狂來次第摻  
只恐高言驚俗耳支頤堅坐口如緘

過陸氏繡林山房

斜照三峯暮長風六月秋綠谿花抱檻疊石樹遮樓竹  
染湘妃淚蟬吟齊女愁登臨不厭劇載酒許重游

得家書

庚申仲秋月逢閏塞鴻南飛初報信數行接得家人書  
知我二人強起居捧函欲讀不忍讀恐有煩愁來徧逐  
忽然破涕爲歡娛破巢纍纍生新雛一門三世欣相見  
念此如何不眷眷况余白髮在高堂有子不肖莫孫償  
他年門戶且莫幸差喜含飴慰晚境只憐短劍滯天涯  
倚閭終歲累親慈身受劬勞不能報覩顏舉子復奚爲

田園樂和錢

興諧

耕吳韻

選六首

牛背風寒一笛鴨頭曉漲三篙白石新磨樵斧綠楊慣  
繫漁舠

細乳紅分蟹眼小槽黃壓鵝雛飯後時呼啄黍醉中怯



聽提壺

日日烹羔賽麥家家擊鼓祈蠶不識帝京直北焉知縣  
署朝南

插棘偶因護鴨携柑正好聽鶯只要竹添穉子不須柳  
號先生

舉網鱖跳縮頸登場米綻長腰社後約鄰浮蟻霜前對  
菊持螯

昨日東鄰遣嫁今朝西舍成婚生長不離稻壟往來只  
隔柴門

同蕭

中素

芷厓暨舍姪

惟璜

亮武過周

渭

丹壑村

居

江南十月回春風霜花開徧霜葉紅客子狂歌不稱意  
行行且向衡溪東衡溪主人周丹壑浩蕩芻襟盤五嶽  
腕下時看風雨飛匣中四照芙蓉鏢五侯七貴意氣豪  
周子跡之如鴻毛眼前孰是同心者落落蕭郎與二陶  
相逢一笑無多語但問日來詩幾許快傾一斗讀一篇  
淋漓酒態鯨吸川嗚呼男兒生世遭顛蹶天遣猖狂銷  
歲月楚弓秦鹿任渠忙樵水漁山安我拙安得衡溪變  
酒池朝朝暮暮醉如泥

聞雞



伊集  
且莫悲長夜雞鳴欲曙天隨風無遠近和雨度山川古  
寺鐘初動深閨夢不全勞勞名利客車馬正喧闐

贈賓杲上人

老覺時難合翛然此息機定中忘去住世外得皈依好  
鳥啼花暖清鐘喚夢歸尚嫌迷六識未敢證三衣

寄徐大司憲

帝城春色鬱葱裏雙闕峩峩連雲起香車寶馬紛駱驛  
朝回爭識天顏喜就中補袞誰最能玉佩水蒼冠獬  
廌抗論雷霆白日移乃是吾師徐夫子當年珥筆承明  
廬薇垣芸局墨花濡宣室承恩降温旨從容諷議人

不知一自浮雲悲去鶴素冠歸來臥苦璞山鬼無人赤  
晝啼蝮蛇倚樹爭研攫始知治亂由重臣蒼生延領待  
管樂綠車召入伏青蒲高岡噦噦鳴鸞鶩菰蘆下士潯  
陽生冷落朱絃調不成憂樂每懷天下志飄零終媿隻  
身輕昨見除書欣額手願隨父老賡太平郭丹高車不  
足羨傳翻讜言且徐傾况今四海爲一家黍谷春回百  
草芽聖人揮絃清海甸鍊石不煩帝女媧子雲諫議  
多暇日法言著就授侯芭

過廢宅

高樓曾記醉芳茵立馬重看淚滿巾乳燕已非昔日主



伊尹集  
曉鶯猶送去年春。雨荒落蘚爭侵路。日落颺颺不避人。  
歲歲野棠堦下發。錯疑紅袖畫堂新。

集張尚爰弘蘧吳曠元朗暨陽寓齋

布衣兄弟任忘形。沉醉江頭天地冥。鏡裏漸添新白髮。  
匣中空老舊青萍。涼聲入幔風驚鵲。晚色侵窻雨散螢。  
僕僕蹇驢緣底事。却輸狂態與劉伶。

梁谿道中

一望如圖畫。清流抱碧山。鐘來知寺近。天豁羨雲閒。  
客路歌聲裏。人家樹影間。扁舟足勝賞。那復戀鄉關。

雲陽早發

是日舍舟就陸

終夜不能寐。篷窻曙色侵。雞聲催曉柝。人影辨秋林。  
雨細輕裝濕。雲濃遠岫陰。却愁谿路滑。未敢驟駸駸。

秦淮覽古

選一首

聞說南朝全盛時。花如羅綺柳如絲。畫船翠箔芙蓉面。  
小院紅燈琥珀篴。愧我已迷桃葉渡。何人能譜竹枝詞。  
無情一片秦淮水。流盡興亡萬古悲。

與史

騏生

千里費

坤

尊冶夜話

客裏逢秋感慨多。一尊相聚慰蹉跎。酒闌舊事難重省。  
細雨青鐙喚奈何。

題友人印譜



伊想集  
有金莫向葛盧生有竹莫傍中山種葛盧武士紛搶攘  
中山文人供戲弄武士文人相間出互持短長爭得失  
君何爲乎并爲一手揮銛刀如不律空山岩堯風雨急  
靈湫百丈蛟螭泣秦碑漢碣少顏色吾聞庖犧氏一畫  
從天開龍馬爾何知負圖真恠哉又聞皇帝臣沮誦領  
著作鳥跡一朝成鬼聲夜蕭索乃知造化本自然銅鏤  
刻刻人工妍寄語劬劬君且止混茫萬物還元始

太息

太息謀生拙經營母氏難一燈霜杵急兩鬢雪花殘病  
久餐應減愁多夢未安天涯有游子淚眼幾時乾

真州夜泊

一櫂長江破浪行。可堪急雨滯歸程。風波滿眼魂無定。  
鄉隴關心夢不成。遠浦檣帆移岸影。荒村雞犬雜灘聲。  
寒燈向客明還滅。愁陣難攻仗酒兵。

爲友人題牡丹畫冊

百寶闌前萬朶斜。深紅淺碧爛蒸霞。分明幻出花師術。  
不向齊庭憶子華。

酒醒華清透曉鐘。凭肩笑把露枝濃。不防野鹿頻來往。  
絳幄銀旛一萬重。

游玉峯精藍懷夏

乾御成六王  
緝基

次耿諸子



荀展緣匡思不窮講堂人靜謁支公鐘沉昨夜松稍雨  
梵落前溪竹葉風拂石落分秋水綠攀蘿城挂夕陽紅  
生憐裘馬金臺客曾此狂歌醉碧筒

東歸

選二首

狂風駭浪石頭城裘敝東歸感慨生獨舸僅隨鴻雁到  
破籬饒有菊松迎依然徒步陳同父賤殺能文陸士衡  
日日灌園愁抱壑何年賦草特知名

清霜一夕鬢成絲醒後因知夢裏癡好古自甘同瓜望  
磨人郵信卽隄麋老親款語商量夜小婦溫言慰藉時  
便說有天何處問空庭蕭瑟葉辭枝

池草

池草荒蕪愧謝家高天雲掩雁行斜只看釜底方燃豆  
何處臺前好種瓜生計自甘輸北阮清流誰許傲南衙  
起予幸有蘇君媿莫恠人情薄似紗

同陸

祖彬

原質

祖麓

紫涓

祖琳

詒毅

張

孫棟

逢吉

朱

震起

石濤金

嚴慎

漢威

張

釐圭

綱文

世組

衛公

姜

遴

萬青集江陰惠

潤

沛蒼寓齋醉後放歌送沛

蒼入

都兼詢莊

永言

祉如

悲哉我生何獨無兄弟熒熒一身誰依倚老親弱子歎  
朝饑秋風漫把荷衣製早歲勤渠出谷求珠盤玉敦時



伊志集  
綢繆微名苦被時人識吹瑕索瘢不肯休俛仰乾坤同  
志幾嘯歌且混斂樵侶翻雲覆雨任悠悠羞將肝膽逢  
人許咄嗟惠子真我師青鏤詰屈蟠蛟影殷勤盛意傳  
盃竿嶙峋古道照須麋座中十子皆年少流珠歎玉爭  
騰蹕乘車戴笠曷足稱相期永矢歲寒盟酒闌四顧三  
太息怪我二十頭先白紛紛蠻觸百無成不如荷鍤且  
逃名余聞此語淚如洗悔不巖阿早決計感君師友兼  
弟梟銘肌不已還書紳只道寸心有千古邨知聚散無  
定所燕雲吳水道路賒鴻雁勞勞關隘阻握別旗亭沉  
醉餘努力加餐春起居故人莊生天下士見時爲訊今

何如

寄呈學使德州田公

選一首

敢將落魄怨清時祇恠文章孰起衰楚璞自甘遭衆棄  
齊竽爭忍逐人吹夢涼礎杵銀河濶緣阻菹鱸釣艇遲  
珍重明公勤慰藉還容百世待相知

閨夜次韻

街鼓報深更篆烟冷金雀愁共燈花生不共燈花落

枕上

天遣窮愁度此生短檠漏下恰三更月移簾畔梅初凍  
雪墮枝頭鳥不驚熟計逢人無善策細慙我是浮名



漫誇客裏詩篇富多半南樓枕上成

扶風書館文燕卽席呈魯郡簡

選二首

金簡光芒接彩霞公餘啓幄領諸家主通將相依前導  
江令文章託後車樹轉黃袍催竹葉風迴紫綬舞桃花  
數聲玉笛霏寒雨落盡江梅燭影斜

兩朝壇坫走寰中文酒流連意氣同黃絹才名誇冀北  
烏衣門第甲江東一丸堪笑瓜牛戰五技真憐梧鼠窮  
從此延津雙劍合司空早已辨雌雄

苦雨

客心愁聽雨况復倚樓時柳濕垂絲早花寒試蕊遲重

簾朝不捲一榻夜頻移僻地誰為伴當盃有所思

生涯

檢點生涯祇自憐陸邊無屋水無船殘春作客貪沽酒  
漸老逢人諱問年古寺廊空雙燕語晴村沙暖一鷗眠  
朝來倚杖晴光好翠岫參差樹影圓

哭葉文敏公一百韻

壬戌四月夏大星隕東南玄陰結讎黜義馭為停驂公  
本玉皇吏去來同飛颿所慮廟堂上孰肯正色譚維  
彼蚩蚩者誰與拯危厓何況斯文喪何人挽詖惡閔予  
從公游髫鬣今鬢髯感恩切知已大節本在三將撫公



遺事以爲世俗矻還念公名德誦誦浹閭閻碑銘各有  
述小言徒詹詹公幼無它嗜經史性所耽綜覽得大義  
細不遺毫纖先聖羹牆見至理信手拈發爲瓌瑋詞渾  
渾元氣涵百家歸牢籠諸子廢詰誦上備矇史誦下饜  
枵腹嚙辟彼天海濶其中無不含二十擢上第金門耀  
華簪出入備 顧問 便殿多祕談相歡甚魚水高遠  
畧堂簾一錢貽呈悞左降遭羅鉗 當宁溫詞遣俾女  
親窮檐公拜稽首上曰乃臣所甘向者侍 禁近任重  
不克堪今得理繁紉庶幾所學覘報稱良在茲敢以職  
小嫌做車奉 命往一試鉛刀銛歎歷未數月氓庶遊

熙恬政成報 天子願老釣魚庵輕舟壓重碇五湖挂  
歸帆有魚足供喫有酒足盈甌謝公屐塗蠟陶令轡製  
籃漸喜人不識自以風月擔俯眎軒冕榮奚啻蠶累蠶  
九重木鳳下震雷起幽潛山林雖可樂未忍忘蒼黥  
慷慨詣 闕下爰副金甌占鳳池雄顧眄丰采中外瞻  
同時珥筆者月露恣雕鑿公念 主雖聖俗未三五咸  
不易者峻命可畏者民晷迺作八箴獻 御屏座右黏  
講筵發疑義大道破重錮豁今復討古啓沃屏羣僉勝  
國三百載軼事將就湮傳聞半影響大義墮烟嵐公也  
總其成焚膏檢牙籤濟濟多吉士北面受一械公曰爾



來思進退務謹嚴一字繫衮鉞慎毋私意探以是史館  
內甲乙判瑤瑛公望隆山斗歆然處以謙吐握勤下士  
蒐材及暫岳鬱爲 王國楨櫛櫛皆梗楠 帝曰嘉乃  
績宜上宗伯銜周官重獄慎惟爾才克兼公體好生意  
輕重親較勘惟恐律例繁書生或未諳體膚誰不愛中  
夜心如快廢書累長歎嘉肺恩意單槐廳雖共事芸局  
誰同參秘書啓卯酉風雨竄銀蟬引經朝惻惻待漏夜  
厭厭五官互効用助勩廢眠餐公也不言瘁永懷覆餗  
慚霖雨將叶兆次第大化漸常願郅治臻拂衣歸林巖  
放棹谷水陽結廬余峯尖同心訂猿鶴永以宦情芟公嘗

寓書侯庵陸公勿庵諸  
公有投老九峯之意

此志迄未就玉樓去何奄是日

會 朝議嘿塞衆口箱公獨持正論一座驚炎炎身家  
何足戀所悲治未誠 鑾輿何日返髣髴治命譖柳車

昇歸邸行路涕霰霏雖云長安第蕭寂如瞿曇冷風入  
幃幙坐臥皆塊苦架上何所有圖書數百函乃知公平  
日鎮俗非矯廉骨鯁自天植疾惡如虺虺所以宵小輩  
反唇肆譏讒蓋棺論益定高行縣秋蟾去年仲冬杪雙  
魚意短緘上言惜時日敬怠別聖凡次感文運剝宿霧  
埋朝暹終悼人事異風波撼危艫謂當平意氣無學漁  
陽慘干言儼面命妙義如撒鹽明珠尚在握驅龍去深



潭欲讀不忍讀雙淚浥青衫因念公遺藁一字當一練  
自足揭日月何乃名山淹小子欲問道迷津空袍履敗  
絮入荆棘欲刈無腰鎌羨彼伴食者早夜惟恒酣君國  
百不問白首樂且湛以公松柏姿乃不比彭聃天道故  
難測我將問龜弁悲歌一千字顛倒髮鬢鬢

重過南村擬訪芷厓滯病未果長句代書

欲上未上浦口潮欲落落未落前村月去時榴火初欲然  
來日蓮房子還結吾生託命在枯蓬來去真如鴻印雪  
觸撥離懷誰最神枝頭齊女聲淒切齊女那知憐病夫  
聒晝喧宵腸斷絕此時可無大小山捉松揮羽談霏屑

相訪寧辭炎帝威鶴脰蜂腰依薤葉寸心愧悵難爬梳  
只尺蹒跚太行截太行有時作平地參辰耿耿成契濶  
知君念我不忍置落月停雲浩歌輟人前每爲解踈慵  
動云禮豈爲渠設勾君七發愈沉痾袞除功不推桃菊  
興來脫幘肯相過除却寒暄訴離別

讀芷厓和作四用前韻

招呼不至北窗風推擠不去南樓月照出愁人一寸心  
悼往傷來成百結誦君新詩千萬徧煩熇滌盡生冰雪  
疾如萬馬怒奔騰矯若孤鴻叫慘切靚如春葩影初翻  
憂若哀絃聲忽絕撐腸何止三十乘欲拾殘膏殊不屑



可憐短褐滯書傭生計年年刻楮葉射虎聲名差自豪  
百戰偏遭左耳截一身跼踏安所容不信天空與地濶  
况堪二豎日延緣巾卷飄零絃誦輟已判謝客門張羅  
一席還爲蕭君設何時把臂吐狂言俗物驚惶避紫茹  
因之援筆和君歌鳳噉蛙鳴聲自別

徐

樹穀

藝初

樹聲

實均

樹本

道積招集培林堂同

### 萬青弘遠賦

高會羅羣彥天涯總故知酒沾花氣暖歌挾雨聲遲夜  
久燈頻剪談深坐屢移追歡興未已愁絕是朝曦

### 七夕舟中戲筆

我欲上書牋蒼旻今夕何夕愁殺人聞道黃姑織女會  
人間天上諒等倫何不黃姑去求偶而使織女來問津  
天公顛倒尚如此何恠塵世女懷春一年一夕一渡河  
歡娛何少愁何多城頭坎坎鼓欲盡草草相逢奈別何  
悲哉兒女不解事漫以瓜果庭中羅渠有良會不自保  
安能分巧與汝麼雖是纏綿祇一夕強似舟中獨眠客  
明夜悠悠河漢斜也與羈人共蕭瑟

一本人間天上諒等倫下有果爾雙

星許匹配何爲一水邈越秦不爾亦當相決絕底須烏鵲空辛勤四句

### 卽事有贈

當壚憐卓氏蕩槩憶盧家釵小無妨雀鬟低恰稱鴉調



脂書貝葉刻燭譜瑤花翡翠三千女風流未許誇

留別葉 振珽 廷玉

雨歇平臯秋氣清一尊長嘯對青萍自來蝸角勤征伐  
從此龍頭諱姓名張儉依人寧失計鄭莊結客本多情  
故園歸去尋知己鷗鷺沙間好訂盟

秋日閒居

背郭柴扉靜秋聲萬樹間輕風翻碧草急雨洗蒼山有  
恨江湖小無名天地閒惟餘沙上鷺飛去復飛還

訓萬青

君才曠代詎應雙顧我何人敢頡頏是處驚弓傷比翼

經時聽雨話連床故交散去成吳越往事尋思等穀滅  
門外雀羅須早設賺人頭白是名場

子夜歌 選二首

歡如池上萍儂作天邊絮飄泊不知年總是風波地  
織成雙鴛鴦新裁合歡枕歡歸醉不知污儂臂上錦

送劉 元吉 正凝之括蒼

千丈霞標捲岫迴送君梯樹上天台玉泉水暖頻須酌  
金簡泥封莫漫開雨後碧桃迎野客夜深玄鶴下高臺  
明從二女祠邊過應笑劉郎今又來

曲水亭次壁間韻



伊想集  
激潭九曲抱孤亭細草新蒲夾白萍古寺鐘聲穿石出  
遙山樹影帶烟暝秋歸野外聞鷓鴣客坐愁中醉醪醑  
欲問流觴何處所暮雲回首一峯青

寄李校書

選五首

門對秋江掩綠蘋粧樓眇斷夜來人擬將紅豆傳芳信  
翻恐書中語未真

漢宮明月楚宮雲青鳥誰傳織錦文一路斷腸衰草色  
爲卿染就絳綃裙

鳳篔簹笙沸絳臺清歌傳自內家來從今莫唱相思曲  
心事應知阿母猜

鐙燼香銷蓮漏深鳴蟲切切夜沉沉誰將月斧修雙桂  
散作人間買笑金

碁聲不斷萬家秋細剔蘭缸照別愁縱使有心窺宋玉  
愁多知汝怯登樓

賦得春花

春來花亦開花落春亦去不知春與花相得在何處

與陳

熹

允文話舊

南湖宜雨更宜烟紫燕黃鸝二月天百尺樓高人獨卧  
十千酒醉客忘年爲嫌苦海羞裁扎却憶甘陵願執鞭  
今日西窗重剪燭狂歌青眼倍纏綿



紀夢

我欲捉塵暎元宗林間把臂誰與同我欲捫蝨談世務  
彼傭大笑書生悞不如入水泛漁舫怒濤萬丈蛟鼉腥  
不爾入山作樵叟貌踰踞前虺伏後進不可兮退不能  
仰頭叫天天不應忽然夢蹋丹臺月流水桃花天地別  
行徧五城十二樓御風不翼排閭闔上帝有命遣六丁  
廣招文士佐太清微臣載拜秉笏立帝謂汝宜供內庭  
對曰臣本草茆士飽歷艱辛厭人世自知凡骨未能除  
才薄那堪香案吏但願稽首歸龍宮溥被萬方霖雨功  
雷電掣空霹靂走一洗世界無妖尅上帝可其奏賜以

頗黎鍾酌之千歲顏如童吁嗟長生我豈戀惟喜世事  
辭樊籠綠鬢消搖九州外脫棄家室如飄風猛聞兒啼  
婦太息仰看屋角東方白

三月三日陪陸侯庵大參崇祀九峯名賢追和諸  
勿庵前輩九日登高原韻

春風酌酒向江天警咳依稀傍几筵不信衣冠成往代  
未妨絲竹會羣賢雨餘草長荒祠畔醉裏鶯啼曲水邊  
自是風流推我輩勝游何必永和年

鏡湖猶記肅秋嘗勝事重修到禊堂滿目山川增感慨  
多情風月待平章坐來嵇阮忘賓主賦就機雲絕輩行



莫以遷流悲物序年年花發勸飛觴

哭程玉懷 選二首

把君遺照惜君賢一度尋思一泫然  
敝榭留方經檢素  
高樓置酒客談玄  
竟歸迎鳳坊前月  
夢斷盤龍浦口烟  
藥臼淒涼茶磨冷  
杜鵑啼徧落花天

芒屨天涯劇苦辛  
中厨時見甌生塵  
折肱豈是謀生拙  
剜肉端為愛客貧  
對鏡離鸞空待曉  
戀巢乳燕可憐春  
誰家露井桃花發  
腸斷當年投轄人

鸚鵡

隴西消息隔重關  
細雨江南影對翻  
幸得主人無個事

雕籠任爾自多言

錢 中遴 翼為招集分韻

四月鶯聲綠樹嬌  
雙柑同醉錦庭宵  
不知禮為何人設  
但覺愁從盃酒消  
訓唱可無正始調  
衣冠半是義熙朝

同席為陸漁山蕭  
芷厓毛南陔諸公  
相看只怪銅龍促  
矯首明河落斗杓

落拓 一作春晚即  
事和耕吳韻

判將落拓送年華  
除却吟詩便看花  
紅袖撩愁四五隊  
青帘賣醉兩三家  
燕憐春盡新營壘  
蜂怕香銷早放衙  
惟有白鷗閒似我  
釣船橫處浴晴沙

龍潭競渡歌



龍潭潭水清且漣微風宕漾綠楊烟穿花十里笙簫舫  
載月三秋書畫舫江南仲夏天中節楚些吳歛擢歌發  
俚俗豈復思靈均但逐歡娛爭鼓楫鳴笳擗鼓聲喧闐  
霞旂羽葆五采妍須臾二龍復躍出鶯梭燕剪勢連卷  
疾如鷹隼搏秋兔狡若狼狽踞高樹木杪延緣百戲噉  
游人噓氣成烟霧誰家淑媛團扇斜釵飛金雀髻盤鷗  
凝眸斂笑似欲語朱顏灼灼芙蓉花白面兒郎年十五  
瀏灑渾脫公孫舞水上惟聞劍槊聲寒光四照霜華吐  
人生行樂貴及時有酒須傾金屈卮不見湘江流日夜  
三閭獨醒徒爾爲樽前况復風情美艾朶葵絲香徹几

鸚鵡踟躕杜氏兒鸞皇宛轉王家女半圭新月入簾清  
交鳥藏鉤無限情漁訶斷續鴟絃杳依舊滄浪好濯纓

迎神曲

江南五月農事忙家家擊鼓吹笙簧噉牲設醴古衙旁  
齋戒扣頭上封章十日五日風雨常龍骨棄寘挂屋梁  
金粳玉粒繞戶香烹羔輒兕獻公堂大小官吏皆循良  
桑麻雞犬化日長明星爛爛埽攙搶疫癘不作壽而康  
譚忠說孝稱先王雖非社日常稱觴年年擊壤歌陶唐  
吾儕樂矣未渠央

後迎神曲



歌迎神鸞旂霜仗夾道新本爲祈福邀神庇誰知反以  
神爲戲本爲田野祝年豐誰知游玩妨農功琅璈八部  
仙家樂蠡車怒馬飛電雹三吳少年甫及笄縱犬呼鷹  
弄絃索編珠織玉鬪繁華繞城十里蒸紅霞無老無幼  
成狂國填街塞巷人如麻家家翡翠簾垂地震作裘裾  
霓作帔遺簪墮珥滿道傍猶自遷延未歸去太平樂事  
見難頻可憐樂極與哀隣攻瑕搗虛來暴客探囊胠篋  
百不存况是天心未易卜汗邪寧滿田家欲竟將一月  
任蹉跎野鳥空聞催布穀憶昔滇黔動鼓鼙九重宣  
詔禁游嬉此風消革八載餘今復爲此何爲乎人生禍

福本有定神降石言何足憑去聲不聞昔賢有遺箴國之  
將興聽于民

贈竹庵上人

世外形容古壺中甲子周掩關詩百卷開冢筆千頭鐘  
動雲難散廊空月易留禪心無住着浩蕩海天秋

卽席

紅牙白紵譜新聲一笑從迷下蔡城只恐醉中狂態發  
金卮在手不教傾

戲東丹壑兼示孫氏兄弟

衡谿清且深濺濺魚鰕宅市遠無塵囂高人此燕息忝



子有嘉招扶藜蹋廣陌同游皆素心將與永今夕到門  
烏雀喧四聽人聲闕知子去何之歸途費揣億子夙敦  
氣誼倒屣不辭劇對床聽雨聲酒漿非所惜比或迫窮  
愁逢飲怯大敵不然畏吾黨詩城高百尺衆寡不相當  
一戰恐敗績捲甲避三舍嘉子亦量力還念天台公詞  
賦擲金石子往乞一旅尚足保疆場計何不出此乃作  
逋逃客紉昔與子俱七日交鋒鏑今子力已竭題詩當  
傳檄火急豎降旌異日免獻馘

寄薛璠栗齋

晴郊呷軋鳴綠車虛堂晝靜喧池蛙好風習習來南牖

蜀葵灼爍蒸紅霞野夫病起無所事閒窗細乳戲分茶  
遙山伐木聞邪許忽憶故人阻天涯河東舊族江南望  
儒冠三十多才華蟠胸詰屈千萬卷宏詞偉論吐滂葩  
採擷春英兼秋實汗牛充棟著述奢未許陳王擅七步  
何物溫生號八叉視彼彫風琢月流奚啻小兒聲嘔啞  
興借提筆鬼神怒半天雷雨驅龍蛇有時鍾王摹粉本  
懸鍼倒薤形如鴉不爾高堂千尺壁擘窠作草醉欹斜  
吳綾蜀紙日不足一行到手爭矜誇有瑟仍向齊門挾  
有鼓惟學漁陽撾峻嶒傲骨時難合悲歌忼慨歲月賒  
天生奇才必有用槽檝安能困渥洼滄溟萬里元只尺



何爲宋莫棲冰衙戟羽聊作六月息尋峰溯洑計未差  
憶昔講堂偕振腕霜鋒百丈淬鎮鄒徵今討古揮塵尾  
窮極窅突揆衿衿置酒論文輒在叫大雅不作響淫哇  
殷勤勗我鄣百川心力短淺徒咨嗟好友相依願晨夕  
蒲帆無邨催歸艇烟波渺瀰隔河漢雲昏月黑啼鷓鴣  
雙魚信斷孤鴻沒楮冠終日吟蒹葭跼然忽驚長者過  
枯庭草木發春芽送迎敢學嵇生懶壞垣破壁但廬蝸  
開尊未遂平原飲鑿坏真似袁閔家以之寸腸盤車軸  
如癢難倩仙爪爬嗚呼英雄不得志青衫憔悴同柎柳  
廿年不了成底事鏡中白髮垂鬢髮贏得虛聲震俗耳

乞詩句扎紛于麻况復蛾眉巧相妒時時飛語中含沙  
白衣蒼狗翻覆手世情飽歷如秋紗不聳仲尼傷兕虎  
吾道是耶還非耶只應長荷劉伶鋪閉門學種五色瓜  
傭書賣餅混蹤跡膏騰不辨瑜與瑕感君識我驪黃外  
延譽無日斲齒牙人生知己得一足吹索繇他衆口譁  
長歌勞君矢皓首一燈清嘯咽悲笳

舟次暗記 選二首

亂點飛螢蹴水紋醉來單枕卧谿雲沉痾憐我成消渴  
絮語鐙前不忍聞

艸艸相逢月又昏風簾殘燭愴離覓此心未敢分明道



留取冰綃認泪痕

宿邵氏宅口號

玉蟲初施漏將殘耿耿螢光照不眠應是冰輪今夜好  
未容高枕負嬋娟

寄社如

選二首

傷春非好女悲秋非烈士四時任循環吾生如寄耳昨  
夜涼颼吹幽香散蘭芷亂葦鳴屋壁缺月照窗紙慷慨  
發浩歌天地淨如洗思我同心人披裘釣江水講學溯  
鴻濛吐詞鎔經史豁然開層雲冰壺互表裏四海皆吾  
徒眼中惟有子河漢邈無垠呱呱不得語題詩寄江流

素心長如此

離離山上松泛泛水中萍萍隨風波翻松以霜雪貞賦  
質有小大秉性亦逕庭憶昔理盤敦谷口鳴嚶嚶同學  
十數人相依影隨形雲雨翻覆間落落同晨星絕交猶  
爲可反唇多惡聲整篋得載書墨光燦華燈紫燕來春  
風呢喃故人情借問爾何爲尋仇日猙獰太息弗復問  
自保歲寒盟

邵式誥

鏡臣詢予近况詩以畱之

選一首

飄零詩酒鬢將斑祇爲浮名損壯顏願得一枝聊息影  
放他弋者暫時閒



呈范龍仙先生

玉鉤宵轉漏聲遲，催起江南鱸膾思。  
滿院竹風留客醉，一溪菱雨對僧基。  
篋中自著潛夫論，海外爭傳幼婦詞。  
縱是東山高臥穩，蒼生引領却為誰。

雨中望惠山

客中無日不凭闌，待得看山烟雨漫。  
應是山靈嬌作態，翠鬟祇許隔簾看。

登君山見壁間舊題有感

風捲濤聲萬木秋，十年此地四番游。  
舊題漠漠塵封壁，只許山靈解我愁。

少年醉墨氣嶙峋，二子相從得句新。  
今日詩成還命酒，

高陽儔侶更何人。  
戊午夏與高范鎔孝婉盧智箕王訪觴飲于此醉後輒題長句今二子相

繼下世故云

酬賀國璘天山贈別之作

霜落江天畫角吹，舊游如夢不堪追。  
高歌對酒皆青眼，秉燭看花半白髭。  
書劔此生聊復爾，風濤滿地欲何之。  
負薪邠放英雄老，莫道功名五十遲。

上學使萊陽趙公

晉陽之地趙為長，連城白壁何瑰奇。  
歷千餘年壁不壞，三寸化作煒煌詞。  
我公挺生仙靈窟，鳳觀虎眎非凡姿。



青緗家世流澤遠一堂昆弟自相師凌雲賦就 至尊  
羨顛額依然鬢髮垂自古才高不擇地百里亦足展所  
爲一琴一鶴桂嶺外棠陰奕奕去後思政聲不脛走畿  
甸 九重宣詔領曹司入則 皇猷賴黼黻出則文運  
勞匡持按巖剔穴皆豪雋無諸臺畔賢無遺 帝謂我  
公真哲匠進退天下職惟宜大江以南號材藪非公孰  
爲定妍媸公奉 簡書戴星出敝車歷錄羸馬隨回瀾  
障川不遺力焚膏繼晷無停披冰雪爲心鐵作榦長松  
百尺歲寒支赫赫邨辭貴人怒此心務令神鬼知去年  
玉峯當歲校和風習習黍谷吹孫敷一顧空凡馬激昂

千里驥與騏聞者嘆息咸泣下何論知己感恩私今年  
暨陽重按部公曰多士爾來思白日悠悠不女待轉眄  
已是賓興期文章六經爲根柢秦漢子史亦藩籬 國  
家右文崇實學鏤冰刻葉徒費時努力雲霄將在望慎  
哉毋以浮名馳以之多士咸感激揚華佩實洗懋詖辟  
彼金錫不同器同入大冶供鎔錘錦衣衽服者誰子自  
外孫山空涕洟潯陽下士媿無繡儒冠二十鬢有絲半  
生苦被微名悞飛翬蔽野身安之獄中之氣久埋沒司  
空遇後光陸離謬冠諸賢一已甚頻加拂拭轉自疑况  
復遠大相期許敢不早夜勤磨治吁嗟高厚莫可量酬



恩有意難捐糜長歌以備輶軒采言之不文殊可唾願  
得此詩畫金石千秋頽壁垂芳儀

誦別蔣景祁京少

江南才地號絕出海內文人皆讓座人懷和璧戶隋珠  
屈指元無一二箇蔣君生長唐貢山裴柳家聲遠近播  
探奇發盡名山藏往來不惜僕夫瘳車轍所至錦滿囊  
千古詩人洗寒餓其中激烈多楚聲白雪陽春孰敢和  
樂府新翻紅豆歌碧梧娟娟初月破誰云秦七與黃九  
吾聞其言輒欲唾賤子局脊谷水陽碌碌名場驢逐磨  
微材何與流俗人如箕之舌爭揚箴閉門著述差自豪

夜郎邴復知漢大朗誦君篇喜欲狂英鋒不覺爲摧挫  
如君才調今所稀胡爲一官尚坎珂固知當世無伯樂  
羈棲槽檻亦堪賀秋風送君歸去來征衣聊且澣塵浣  
倘許羊求訂素心三徑何辭一載過

歸舟雜記選二首

篷背霜欲落殘月挂樹頭誰家深閨女織作聲不休停  
機長太息仰睇明河流豈不甘安寢聊爲衣食謀今我  
飽藜藿禦寒有棉裘不感天公憇而反多怨尤何惟鬢  
邊髮二十已先秋

今夜由拳道明日谷水陽思我東籬下叢菊綴深黃相



見定含咲笑我鬢邊霜隣家正穫稻十里罷亞香問我  
何處來勞苦酬一觴高僧共對飲飲罷開詩囊回首風  
塵惡濯纓歌滄浪

讀儲欣同人近稿却寄

廣陵絕調幾人傳到處論文覺汝賢泣露幽花還自媚  
冶容棄婦豈爭妍由來意氣羞牛後漫說功名在馬前  
最是舊游還入夢芙蓉江口木蘭船

次韻訓陸

振葉

涪裳

千林霜淨月窺窗知爾孤庭對影雙賣賦却嫌文價賤  
羈愁難遣酒兵降池邊草長名留謝夢裏花飛筆授江

記得聯吟南浦畔一尊風雨促殘缸

偶攜筇杖叩僧窻尺素欣傳鯉一雙別後猖狂知不改  
近來意氣可能降厭聞俗事惟耽酒苦憶雄心在渡江  
料得詩成孤枕夜斷鐘殘角對寒缸

過陸蔚文先生葑溪園居

仲蔚隱蓬徑孔明棲草廬天地任所託志士耻懷居夫  
子豐年玉落托混陣磔誅茆無人境巷隘不容車短牆  
覆石髮飛雀馴堦除秋風掃落葉當窗紅樹踈樹罅漏  
殘日曬我腹中書同志四五輩携手揮金鉏高標起後  
進追琢皆璠璵洪流分一掬濯濯成清渠昔時共几席



昂首今天衢而乃草元人寂莫獨何與五茸列絳幄女  
樂聲縈紆荒祠紉祖澤日落常躊躇故園不百里吏隱  
本遂初松菊知無恙風月時相於我來訪公宅入門雙  
龍躍吟吟壁間蟲衙衙水中魚泉石導幽興欲前還次  
且撥醅進家釀堆盤薦園蔬高言矧俗耳鐘鼓駭鷄鶻  
三代本直道斯人誰毀譽何時載酒來永以俗情祛

把卷

把卷無端老淚斜底須商婦訴琵琶浮雲作態遮晴日  
急雨知時送好花久客可憐兒廢學長貧終累母持家  
江頭滿眼風波惡何處垂楊繫釣車

贈邵

式平

秦侯

選一首

三載論心禮俗捐不勞白鷓締忘年交情近日同萍梗  
識盡今人識汝賢

避地

選四首

投閒今決計小築近橫塘繞徑千株柳緣溪十畝桑洞  
中無晉魏枕上有羲皇欲問雙蓬鬢年來爲底蒼

落拓從吾懶漁樵濶此生已邀鹿作友還倚石爲兄林  
密藏山色庭空得磬聲尚嫌名字在未許閉柴荆  
掃却繁華夢山僧伴去來穿雲携古杖蹋月上高臺名  
借清狂避詩從爛醉裁只看歌舞地寒食野棠開



落日鷓鴣爭樹開，軒對晚霞烟。荒茶竈冷，風定酒旗斜。病識君臣藥，愁消兒女花。隣家新釀熟，約我話桑麻。

題甲乙集後

槐風十度馬前吹，博得詩名海內推。金榜當年多少客，只今姓氏幾人知。

踈狂自被俗人嗤，世態何須老去知。但使愁心似酒醲，此生也有暫拋時。

寄顧

時諧筠章

風雨孤邨暮，憐君尚路岐。才高人共棄，地僻鬼相欺。遣恨書盈架，衝寒酒一卮。不須嗟伏櫪，千里會驅馳。

旅夜

斷續鳴雞夜向闌，夢回孤枕一燈殘。斜風細雨尋常事，底爲羈人分外寒。

嘲筆

曲直生來豈自由，黑頭便已躋通侯。君頭自黑吾今白，慚媿當年不早投。

筆答

作伴陶泓二十秋，批風抹月許同游。從今便向中山去，問爾憑誰告訴愁。

懷徐

洪基安士



祇爲謀衣食年年作客遙殘冬猶異地細雨復寒宵音  
問不可得愁懷何以消燈花殊爛熳早晚卜歸船

偶興次韻

竹窻斜礙日煨火撥殘紅慧鳥勤留客寒花怯倚風閒  
知書有味病識藥無功今夜衾如鐵長身欲作弓

蠟梅

雪壓風欺數朶橫丹心欲吐待新晴從今混入羅浮譜  
記取黃香是小名

冬日雜感

選四首

冰澌挾浪瀉淨淙霧重雲酣天改容準備嚴寒無一策

思量生計愧三農心非野碓春偏急才似黃楊閏屢逢  
傾罷濁醪誰可語相看不厭是長松

朝曦也復到茅檐飯罷欣然一卷簾老樹苦隨僧鬢禿  
遠山巧奪筆鋒尖從無白雪人能只有青氈盜亦嫌  
聞道躬畊堪避世不將手板換腰鎌

十里寒香醞綠苞急風迴雪聚塘坳魚驚水涸難逃網  
鳥怨枝空欲墮巢無復聲名誇射虎漫隨父老說迎貓  
壯心不與灰同燬一卷楞嚴呵凍抄

往事寧堪重拊膺生涯一任醉騰騰飽嘗炎冷真如瘡  
筭享清閑已讓僧非爲干時仍扣角也曾入世恠摸稜



故人問我今何似除却吟詩百不能





